

▲命令▼

大元帥令

本屆國慶日致祭歷次殉國諸先烈士派參軍黃大偉代往行禮此令

大元帥印

中華民國六年十月八日

大元帥訓令

令參軍長許崇智

呈辦事細則請批示由

呈悉所擬該處辦事細則大致尙屬妥善間有未盡合宜之處業經改正仰即遵照辦理可也改正細則抄發此令

大元帥印

中華民國六年十月八日

▲布告▼

大元帥布告

昔炎德中微建虜猾夏肆其梟桀鞭笞宇內于是仁人志士目擊心傷誓雪鉅恥奮戈挺兵前仆繼起雖久暨匪一其欲發憤而致死于虜一也閱時既久大誼益章共和民治之旨既深淪浹于齊民之心而虜主昏厥亦尚傾側媚外割地喪權以是海內洶洶知非事驅除則芸芸禹甸易世以後靡有子適迺陵嚴威冒萬難奮起名城通都之間飲丸履刃者後先相望雖有淫刑大罰氣不稍撓是以辛亥八月鄂渚首義而海內羣起應之時不數旬遂覆清祚成功之速振古未有斯不惟天奪虜運亦以諸先烈百折不撓之概深有感于國人正義既昌勢不反顧也民國既建凜國步之艱難念締造之不易以鄂渚首義爲陽歷十月十日因定以爲國慶日著之令典以識不忘然自六年以來袁段諸逆迭爲僭亂民瘼莫蘇國本未安卽此國慶紀念亦復岌岌飄搖闇然無色此亦國人所深痛也本歲國慶紀念之日又爲段逆僭據首都之時文受討逆之任越在南疆昕夕跼勉緬懷先烈亦欲與我國民飲水思源知民國締造之由來暨夫諸先烈之耿光偉業爲吾人所宜拳拳服膺致其誠敬于茲紀念大典交相勗勵共紓衛國之忱力荷建設之責以保持此國慶日至于無窮燿其輝光樹我中華民國丕基前型不遠國難方遘挾持光大我邦人其念之哉

函電

電

程潛致大元帥電

廣州孫中山先生南寧陸巡閱使譚督軍全州陸師長雲南唐督軍廣州陳督軍程總長林海軍總司令李林兩軍長馬總司令張方兩師長並轉各鎮守使非常國會諸公貴陽劉督軍重慶熊鎮守使暨各師長永州賁旅長衡州鳴銜均鑒權奸竊政壞法亂紀叛督逞兵致國會於解散復辟召亂逼總統以退居國本不存凶頑盈聚共和僅存虛名淪亡將見實禍西南護法志在討賊義憤所張舉國奮興湘南將士同此職志零陵鎮守使劉建藩第二旅長林修梅於九月巧日宣布自主寶慶守備第二區司令周偉亦於本月冬日宣布嗣以地域廣袤軍隊衆多公議設立湘南護法軍總司令部於衡州以謀統一而利進行並經推舉潛爲總司令兼管民政事宜自惟材輕識謏職責艱鉅不克負荷懼於隕越固辭至再不獲衆允祇得竭其棉薄勉任其重業於本月魚日履任視事效義前驅期夷國難諸公靖國情深討賊誼切碩畫嘉謨指益必多幸冀時賜鉞規匡其不逮臨電無任瞻依湘南護法軍總司令程潛叩陽印

湘南將士致大元帥電

廣州孫中山先生南寧陸巡閱使譚督軍桂林陸師長雲南唐督軍廣州陳督軍程總長林海軍總司令李林兩軍長馬總司令張方兩師長并轉各鎮守使貴陽劉督軍重慶熊鎮守使暨各師長永州賁旅長郴州邱統領均鑒竊自段氏專政叛督稱兵逆餉入都國會解散復辟變生總統逼迫冒共和之名行專制之實亂國壞法以遂私圖淪胥之懼莫此爲甚西南鉅公羣起護法初不忍以兵戎相見致蹈操戈同室之嫌儆勸交至冀其悔遷乃臬鏡性成執迷不悟猶復遣將募師勞師興戎北軍南下公然興義爲敵

湘省地扼南北咽喉岳州重鎮早爲鷹犬爪牙所踞命傳入湘早欲以武力制服西南楊等治軍湘南不忍國家桑梓坐待淪亡宣布自主以爲自衛而段家軍旅日相進迫同人等護法靖國天職所存除奸剔惡責無可貸用是勗我同胞勵兵秣馬用剪醜類以伸國難程君潛吾湘宿將衆望攸係已膺羣推爲護法軍湘南總司令業經呈電詳明陸巡閱使在案總司令部已於本月麻日成立凡關於湘南軍民兩政悉聽其指揮管轄藉資統一而利進行諸公掬誠護法蓋籌衛國崇高所及指教必備乞予接洽無任感盼湖南第一師師長兼第一旅旅長趙恆惕零陵鎮守使劉建藩陸軍第二旅旅長林修梅永屬區司令官謝國光江道區司令張建良副司令黃岱桂區司令羅先愷第二區司令周偉等叩麻印

▲廣告▼

○軍政府公報處廣告(一)

本公報現暫以長壽直街第四號廖球記代理發行凡內地外埠欲購閱本公報者希逕向該店定購可也此佈

本公報價目

- 一本報每日出版一號
- 二定購一月者定價大洋八角三月二元三角半年四元五角常年八元須先交報費
- 三國內及日本每號郵費半分南洋美洲各埠郵費酌加
- 四零售每號四仙

○軍政府公報處廣告(二)

啟者本公報現既出版至第十一號以本號爲止仍照前贈送自第十二號起除各行政公署及各公共團體仍繼續送閱一份外其餘各個人恕不贈送愛讀諸公請致函長壽直街第四號本公報代理廖球記定購可也此佈

中華民國六年十月四日

軍政府公報處啟

○大元帥府參軍處啟事

啟者大元帥府之電話號數如左

- 秘書處二一零零
- 參軍處副官室庶務科二零四四
- 衛隊室二零六九

大元帥府參軍處啟